

## 2 PIIHTER

### Riown Wargahng Agweed Piihtere

#### Rob Ke Nying Warga

Riown warga gihn agweed Piihtere aohr ke yih amahr jo yiiho giih upiny kan. Ngo agweed kaa nying ciehg dhe yooch oogo yih yaa puohny giih ucahb beere giih bal, ge tuohl ke nying giih nu ge be bar maalo. Giih ni ge thiehdh kaa dhe yoohn ngey Juog kedea Jeacuu Kriihjto ke ngeyo ne ngaa maa adiehr. Nyoge me Jeacuu aniid gene ulihng gene puohny gihre, ge naa abaar ngo wong maalo. Piihter wiihe acube ke ne cohg toohd yaa peehmo kejea Jeacuu be duu keehdo. Ngo arobe kejea Jeacuu poohd gaal ke duuo bang gihn be daahd ngo unud ngaa me wonge rwaahny, abea ngo daahd ngo ubeehn nyoge cang umaan gene anyoohne giih gen.

#### Kaa Acaan Luube

Lum umodho 1:1-2

Cuohn jo yiiho 1:3-21

Yaa puohny ucahb 2:1-22

Duuo gihr Jeacuu 3:1-18

**1** <sup>1</sup> A Cimoan ge nying tuoda, Piihter a ge aohr Jeacuu Kriihjte ne ngad tiihye kedea ne ngaa me oohre. A ne gweehd yihru wu yaa ayoad yiiho me wiihe ne maalo me neehn mar wan. Ngo ayoadu kaa dhe yoohn nahg Juoge, gihn wuoro, abiohgrwaal kedea unahg Ngad Boadh nyoge Jeacuu Kriihjto abiohgrwaal thiow.

<sup>2</sup> Beehn Juoge cube amahr muunye kedea doohr yihru ke dhe yoohn ka ngahyu Jeacuu Ruohdho.

#### Tiihj Gihr Juog

<sup>3</sup> Juog e naa acub giih daahdo cang ke nying beehdo me beer me nhyaar Juoge yihro ke tee gihn nud yihre. Giih nu ge yoado bang gihn ngahyo Juog ngaa acuohn won ne nywaag beeye kedea tee gihn ne yihre. <sup>4</sup> Ke nying giih nu e Juog giih me doonge me beeye ge utiihye yihro wa kaa acege ngo piny, giih me meehg won beehdo naa abiohgrwaale wa ka nahg Juoge abiohgrwaal, kedea ge giih me kahl won oogo yihdh giih raahyo ge nud wiih piny ke nying giih reje ge yuohd cwihny rog gen.

<sup>5</sup> Ke nying giih nu beeye, Juog daahd utiihyu keraahyo beere beero madu ke rih yiiho gihru kedea rih beero gihru madu ngahy nyepinye ree <sup>6</sup> kedea rih ngahy nyepinye madu dhe yoohn koar rog oogo yi gihn me raaj. Thiow madu guum nyepinye rih koar rog oogo yi gihn me raaj kedea rih guum madu dhe yoohn beehdo me beer me nhyaar Juoge. <sup>7</sup> Kedea rih dhe yoohn beehdo me beer me nhyaar Juoge madu nhyaar nyoge rih ngo kedea rih nhyaar nyoge madu nhyaahro rih ngo. <sup>8</sup> Bang gihn nea giih nu ge nud yihru ke dhe yooch me rog gen jwag gene jwaa, e wu uyug gene ne nyoge me lumu be dhaahr kedea tiihyu apahdh kare ne cej dhe yooch me ngahyu Jeacuu Kriihjto Ruohdh. <sup>9</sup> Bang gihn ngaa yihre tooro giih ni uroomo ke ngaa me cwihnye athow kedea wiihe awul ukwihye ngo kejea adhemuohme giih anaa atiihye coon ge akahl Juoge oogo ree.

<sup>10</sup> Kea noono jo'a, tiihyu keraahyo ne nyoadh ngo kejea Juog wu acuohne ne cohg kedea cwihnyu unahgu keew yaa akwanye. Kaano arumo e wu buu ucahg pahdh yihdh giih adhemuohm. <sup>11</sup> Ke dhe yoohn tiihy nu, e Juog dhe yooch uyabe yihru laaj ne lor wun ne mon yi Dhaahr Ruohdho Jeacuu Kriihjto Ngad Boadh nyoge ge guge tooro.

#### Giih Arob Kitaab Juoge

<sup>12</sup> Ke nying gihn nu e ne beehda e cwihnya ne kwaay rob yihru ke nying giih ni keehd me nahg gene giih me ngahyu ke coon kedea keehd me nahg gene athere maa amagu teeg mee. <sup>13-14</sup> Gihn nud, ngo anyoadh Ruohdho Jeacuu Kriihjte kejea nihna wiih ngoom ge cahng ke thumo. Abee ge poohd wonga nud, e giih ni ge roba robo yihru beere wudhu be wul rog gen. <sup>15</sup> Thiow a atiihyo keraahyo, beere wudhu be wul rog giih ni, batien thona.

<sup>16</sup> Padh giih teeg wong ge naa ayug wane ne waaj giih puoge yihru ke nying tee ne yih Jeacuu Kriihjto Ruohdho kedea ge anaa arub wane ke nying duue. Abee tee ne yih Jeacuu ngo aniid wane ke nying wan. <sup>17-18</sup> Wa anaa anudo wiih good beed Juoge kaa anaa alog kaan nyinge rog gen naa abeehn Juog wahne uleeye ngo kedea umoare wiih ngo. Wa anudo kedea duon Juog naa arubo ke yoohn maalo ngo alihng wane e urubo kea, "Gihn e naa Waahda maa anhyaara keter kedea cwihnya med ree."

<sup>19</sup> Noono ke nying giih nu e cwihny wan be daag ke nying athere giih agweed yaa agamloohngjuoge. Nea maano e kea cubu wudhu rog giih agweed gene wa gihr ngaa maa acub wiihe rih lama me liel yi muudho. Nea maano kea dhiilu tiijh ke giih agweed uwahdhe cahng uduu Ruohdho Jeacuu Kriihjte kedea cubu wudhu rog giih nu uwahdhe yi ruu piny ge moohl cahng. Gihn nu e ne room keehd daahr Jeacuu ge meeny wun neehn ciehj ruuwow. <sup>20-21</sup> Abee gihn wiihe ne maalo beehda unghayu ngo kejea giih agweed yi kitaab Juog padh yaa agamloohngjuog ge naa apar gen ke kar wudh gen. Beehda Wahy Juog ge nud ke gen, e naa acub luub Juog yih gen ne gweedo.

#### Yaa Ucahb Kedea giih Puohny Gene

**2** <sup>1</sup> Wa kaa anaa anud yaa agamloohngjuoge maa yaa ucahb kiin nyoge coon, ke dhe yoohn nu thiow yaa puohny lum Juog maa yaa ucahb ge unud kiinu. Ge upiih ne puohny giih toohd ke piny me raany lum Juog kedea ngo upiem

1:2 Juud 2    1:3 1:16-17; Epi 1:3    1:4 Rom 5:2; Jeam 1:14-15    1:5-6 Tii 2:11-12    1:6 Gal 5:22-23    1:7 Gal 6:10

1:11 2Tim 4:18; Ngad Boadh nyoge: 2:20; 3:18; Tii 3:6    1:12 Juud 5    1:14 2Kor 5:1; 2Tim 4:6; Jon 21:18-19    1:16-18 Mat 17:1-8

1:19 Rom 1:2; 13:12; 1Pii 1:10-11    1:21 2Tim 3:15-16    2:1-22 Juud 4-13    2:1 Mat 7:15

gene kejea Jeacuu Ruohdh kuu athow kaa nying gen ne boadh wahy gen. Ke nying giij nu e naa giijn uguo giijn me raaje pahdh wudh gen urwaahny nying gene. <sup>2</sup>Abea nud ke nyoge me thoohd muu upiij ne ngoor giij cwaahne ge tiijhy yaa ucahbe. Noono e naa ka ubeehn nyoge urob gene giijn me raaj ke nying adiehj anyoadh Juoge. <sup>3</sup>Bang giijn yaa ucahb ge nyoge me nhyaar giij lonyo, noono e giij lonyo ge uyoad gene ke nyingu ne cam gene wun e ge puohny giij puoge. Abea keehd maano e ge beehda nyoge maa akihm Juoge coon kedea giijn me gug wudh gen ge urwaahny nying gen ngo adooing e ka me pahdhe wudh gen.

<sup>4</sup>Bang giijn Juog wuohdjuog giij anaa ayug adhemuohm ge keá wiio e ge be kihme. Ge akihme uthoohre gen Paar Maaj ne beehd yihd kuohn me reje maa muudho ne koar Cahng Lug Juog. <sup>5</sup>Kedea yaa adhemuohm abeed wiij ngoom umodho coon e aboar poohd kuu ayug ree ge keá wiio e ge be kihme. Ge anaa akihme cang naa akahle aboar maa amud gen, unahge Nooh ngaa puohny dhe yoohn beehd naa abiohgrwaal ke Juog e naa akonye ke jo paare kar ge abiihjeriow. <sup>6</sup>Juog thioiw geedh Codom maa Gomoarah ge kea wiio e ge be kihme. Ge akihme naa awaange geedh nu udoohng gene ne bur. Geedh nu ge awaange beere giijn atiihy Juoge rog yaa adhemuohm naa abeed geedh nu ngahy yaa udog giij adhemuohm ke tiijhy cahng moogo. <sup>7–8</sup>Abea keehd maano awaange geedh nu, e Juog akony ngaa me nyinge Lod bang giijn ngo ngaa me beer me cwihnye anaa abeehdo e raaj ke nying nihn ke nying giij reje ge tiijhy yaa adhemuohme yi wonge. <sup>9</sup>Me neehn maano atiihy Juoge wa giijn nu, e kea gaahnu bang giijn Juog dhe yoohn ukonye nyoge me beeye ngo ngahye nea rog gen ayoad gene yihd giij utum me reje. Kedea ngo ngahye ka umeehge yaa reje beehdo e ge akihme ne koar Cahng Lug. <sup>10</sup>Adooing yaa nhyaar giij reje ge yuohd cwihny dhaane rog gen maa yaa dhahl giij kuow yi maalo, ge ukihme keter.

Yaa ucahb ge nyoge maa yaa nhyam me nying gen be tud ne dhahl jo doonge maalo. <sup>11</sup>Maanyu wuohdjuog ge yihr gen ne tee me tooro yihr yaa ucahb, nea ge piij ne rob giij reje naa ayug jo doong maale yihr Juog e ge be rob gene kaa dhe yoohn ayaany nyum Juog. <sup>12</sup>Yaa ucahb giij dhaahl rob gene robo rih Juog kedea dhe yoohn pahr laahye kii ngo e ne pahr gene kii ngo. Noono e ge rub oogo ne pahy now ke nying giij me kwihy gene. E naa giijn urwaahny Juoge nying gen wa mar laahy ge mag unahge.

<sup>13</sup>Unahg giij raahm kuohm ge nuu uyoad gene. Giij raahm kuohm me room keehd giij raahm kuohm ge anaa ayug gene rog nyoge mooge. Mihn cwihny mar gen beehda yug giij maa cwaahne kii diehr cahng. Ge nyoge me jwaahl cam ke giij cwaahne kedea diid cwihny ge tiijhy gene kaano piij gene ne cam yihd yaaye giij yugu. <sup>14</sup>Yaa ucahb giijn nhyaar gene beehda kwaay kaab maahn. Ge nyoge me raany wudh maahn ubeehd gene e ge pahdh yihd giij adhemuohm. Padh maahn keed gen ge ne wudh gen raany gene, abea keehd yaa yiio, giij yiio gihr gen thiin, wudh gen raany gene raanyo thioiw. Ge nyoge muu udhiil Juoge ke kihmo ke nying giij nu cang. <sup>15</sup>Giij nu reje ge tiijhy gene bang giijn ge akweer ke dhe yooh me beer. Ge apiij ne ngoor giij atiihy ngaa cuohn ne Balaam waahd Biohr. Balaam anaa anhyaar ngiihny yoade ke nying giij me reje maa atiihye. <sup>16</sup>Abea maanyu kaa anaa acuow akaje Balaam ke nying awuohj giijn atiihye. Akaja ge be rubo, arubo yiire wa dhaano utaahngo beere giij ngaa maa amuohl ge tiijhy ge wiie wiio.

<sup>17</sup>Yaa ucahb ge nyoge me giijn me beer me yoad bang gen tooro. Ge neehn abuulo. Abuulo me ge wahn dhaane wiie, e yuude e yea atal. Ge nyoge me ne thal thal ke luube wa mar lwahd me keedh yame ke bang yi poohlo. Kaa akoj Juoge nuu ucub gen yea beehda ka me col ne cihd cihti. <sup>18</sup>Ke dhe yoohn nhyam me gihr nyinge tooro, cwihny nyoge meehg gene ke yuohd rog giij nyooro ne leel nyoge ne tiijhy giij adhemuohm. Yaa nu daahd gene ke leelo ge nyoge maa akweer ke giij adhemuohm ka me cahng mee. <sup>19</sup>Ge ukoohbo kejea, yaa lihng luub gen ge buu unahg baahng. Abea yaa puohny giij ni ge beehda baahng giij adhemuohm, bang giijn dhaano beehda ubaahng giijn akwahng ngo piny. <sup>20</sup>Noono, ngaa maa agwahny bade yihr dhog yiehdh reje giij wiij piny naa angahye Jeacuu Kriihjo Ruohdho Ngad Boadh nyoge kedea udoge pahdh yi cing adhemuohm, udoohng ne baahng yiire, e ngaan nu ne yi giijn me raaj maa akaal wiij mar umodho ge anea yea. <sup>21</sup>Ngweehn me toor giijn maa angahy gene ke nying dhe yoohn doohng naa abiohgrwaal ke Juog yihr man ngahy gene dhe yoohn nu kedea udog gene ngahd gen ke loo bang loohng giij Juog ge anaa acub yihr gen. <sup>22</sup>Dhe waahnyo maa acoon nud me koohbo, “Guohg doo wudh ngoog giije ne cam gen, kedea kudhruug, keehd me luoge ke piij e doo ne nween ree ke cuohdho. Wa giijn nu thioiw keehd yaa dog ne tiijhy giij adhemuohm.”

### Cahng Ukihm Juoge Nyoge

**3**<sup>1–2</sup> Goma maa anhyara giijn e naa riown wargahng gweeda yihr. Ge agweeda yihr ne meehg wun par giij me beeye kedea beere wudhu be wul rog giij agweed yaa agamloohngjuoge kedea giij arob wane yihr ne tiijhy wa jo oohr. Giij arob wane yihr ge beehda luub Ruohdho ge Ngad Boadh won.

<sup>3</sup>Giijn wiie ne maalo beehde unghy ngo kejea nud ke nyoge me cood yihd giij arob ke nying lum Juog muu ulog beehno yihd gug nihn. Ge upiij ne yug giij reje ge yuohd cwihny gene rog gen. <sup>4</sup>Ge ukoohbo kejea, “Wa anaa arob Jeacue kea e uduu abea ngo ne kee maa abeehno! Ke naa athowe ke weehne e giijn maa awaar ree tooro ke naa acag wiij piny cago.” <sup>5</sup>Abea ge daahd uwul wudh gene rog giij maa athere me neehn: Juog coon umodho maalo kedea piny ge acage ke dhe yoohn lume naa arobe. Juog piny acage une wiie piidh kiin piij kedea utiege piny ke piij. <sup>6</sup>Thioiw anahg ke dhe yoohn piij e naa abeehn Juoge uraanye wiij piny yaa acoon naa amoale ngo piny kaa aboar. <sup>7</sup>Ke dhe yoohn lum Juog naa arobe maalo kedea piny ge nud awaahn ni, ge akihm kejea ge uwaang ke maaj Cahng Lug. Ge poohd e ge ke wiio tudu ne koar cahng ubeehn Juoge urwaahny nying yaa akweer ke lum Juog.

<sup>8</sup>Abea goma maa anhyara, wudhu keá wul rih lum ni acielo ni: Yihr Juog, run aliib acielo ge uroomo ke cahng acielo kedea cahng acielo ngo uroomo ke run aliib acielo. Yihr Juog ge beehda acielo. <sup>9</sup>Juog be gaal nea ngo tiijhy giijn

acege piny wa ka teed nyoge mooge. Giih nii ngo Juog be dhaahr ke koar bang gihn daahd dhaano cang uwiie tiihy adhemuohm beere ngo be rwaahny.

<sup>10</sup> Abea nea cahng akob Juoge kea Jeacuu uduu, e ngo uduu keehd maa akoohb Juoge kea e koar wun. Jeacuu uduu ne kwaan wa beehn ngad kahw. Cahng uduu Jeacuu e maalo une mad e ngo umahro udoohng kare ne weehny. Juog, giih ne yi maalo ge uwaange utoor gene. Thiw piny, kedea giih ni yea, giih acag Juoge kedea giih ayug dhaane ke cinge ge uwaange cang utoor kihd gihn me doohng.

<sup>11</sup> Me neehn maano ubeehn Juoge uraanye giih nu cang e wu unahg nyoge me ngihde? <sup>12</sup> Nahge ke cahng Juog e ne bange yuogu beere ngo meehgu ke beehno piow piow. Cahng ubeehn Juoge uwaange maalo kedea ubeehn giih ne yi maalo uleeny maaje gen cang. <sup>13</sup> Keehd me beehn piny kedea maalo uwaang gene e ngo gaahno gaahno kejea maalo moogo me nyaahn kedea piny moogo me nyaahn ge utuohl. Ge utuohl bang gihn Juog e naa arob ngo. Yea maahl nu kedea wiih piny nu, unahg yaa abeehdo naa abiohgrwaale ke Juog ge nuu ubeehd kuohn nu.

<sup>14</sup> Kea noono goma maa anhyaara, me neehn kaano nahge cahng nu e ne bange yuogu kea tiihyu keraahyo beere wu ke yuudo e rogu cang e adhemuohm tooro rogu kedea e wu ubeehdo ke nhyaahro ke rogu. <sup>15</sup> Wudhu keá wul rih gihn kur Jeacuu ke nyinge. Jeacuu ukuro bang gihn ngo daahd uboadhe nyoge. Umiiho e nyinge Poal anaa agweehdo yihru ke nying giih ni bang gihn ngo ameehg Juoge dead yihdh giih. <sup>16</sup> Dhe yohn agweehd Poale yihdh wargae giih cang, ke nying giih ngo, keá waaro. Adiehr muon, yihdh wargag nu giih mooge me teeg ge nud me yihdh gen be rom nyoge mooge ke deado. Kwaad giih agweed ge be rom nyoge mooge ke deado ge naa giih yihdh gen cood yaa gihn me ngahy gene tooro ge yiiho gih gen thiin. Mooge maa agweed yihdh kitaab Juog ge cood gene coodo thiw abea gihn nu e nu unahg gihn me rwaahny nying gen.

<sup>17</sup> Kea noono wu goma maa anhyaara me neehn kaano beehd e giih ge ngahyu kea koaru rogu beer mee beere e wu be pahdh yaa awuohje maa ayug yaa dhahl yihdh loohng. Koaru rogu beere wu be dog caahn karu noono beer nu.

<sup>18</sup> Beehn beero kedea ngahy nyepinye ge yoad bang Ruohdho Jeacuu Kriihjto Ngad Boadh nyoge kony gene wun udoong yiiho gihru. Moaro wiih Jeacuu ke wong ke wong. E noono.